

# UVODNA RIJEČ

## EDITORIAL

Cijenjene kolegice i kolege,

Uloženo je mnogo truda da se objavi još jedan broj Geodetskog glasnika, broj 46. Čitajući Geodetski glasnik, čitalac je svjestan da je u prilici proširiti znanje i informacije u vezi geodetske struke u svijetu, ali prvenstveno u Bosni i Hercegovini. Naši čitatelji nas obavještavaju da su dostupni članci i informacije, koje pruža Geodetski glasnik, međunarodnog nivoa što nas čini izuzetno zadovoljnim. Naša stremljenja su u smislu "uklapanja" u aktuelne svjetske trendove, uz očuvanje kontinuiteta izlaženja časopisa.

Tekuća 2015. godina za geodeziju Bosne i Hercegovine je veoma značajna jer je bila posebno bogata brojnim događajima, koji će ostati trajno zabilježeni za budućnost.

Akademija nauka i umjetnosti Bosne i Hercegovine je 2013. godine ugasila Komisiju za geodeziju i geofiziku i najavila povlačenje iz članstva Međunarodne unije za geodeziju i geofiziku (International Union of Geodesy and Geophysics - IUGG). Rukovodstvo SUGGSBIH je tokom 2014. godine poduzelo niz aktivnosti, te sačuvalo bosanskohercegovačko članstvo u tim izuzetno važnim međunarodnim organizacijama. Napokon se veliki trud isplatio. Naše Udruženje je član IUGG-a. Više detalja o navedenom dato je u jednom od priloga ovog broja Geodetskog glasnika.

Nakon ove značajne vijesti za geodeziju i geodete Bosne i Hercegovine, druga vijest, koja djeluje prilično razočaravajuće, vezana je za Geodetski zavod. Bosanskohercegovački geodeti su dugi niz godina imali preduzeće koje je obavljalo geodetske poslove većeg obima na teritoriji Bosne i Hercegovine - JP „Geodetski zavod“ Bosne i Hercegovine, sa sjedištem u Sarajevu. Geodetski zavod je osnovan 1962. godine iz operative Geodetske uprave BiH, s ciljem izvođenja radova na novom topografsko-katastarskom premjeru BiH. To je bila državna radna organizacija koja je izvršila premjer gotovo kompletne teritorije Bosne i Hercegovine, te izradila i reprodukovala mnoštvo karata i planova različitih razmjera i namjena. Uspostavljen je katastarski operat na većini teritorije Bosne i Hercegovine i stvoreni su uslovi za sadašnju Infrastrukturu prostornih podataka-IPP. Problemi vezani za neriješeni status Zavoda počeli su krajem 1990-tih, a kulminirali u prvoj dekadi 21. vijeka. Od tada kreće agonija i borba uposlenika za opstanak firme. Nažalost, od ove godine praktično više ne postoji JP „Geodetski zavod“ BiH. Umjesto da se u 2015. godini obilježi trideseta godišnjica nove zgrade Geodetskog zavoda, podignute zahvaljujući velikom trudu i odricanjima brojnih generacija njegovih tadašnjih uposlenika, zgrada je postala vlasništvo Fudbalskog saveza Bosne i Hercegovine! Iako više nema Zavoda, postoje planovi, digitalizovani planovi, rječnikom običnog čovjeka rečeno „sadržajno selektivno precrtani planovi“. Ovi planovi i karte su djela Geodetskog zavoda i njegovih zaposlenika koja postoje i postojat će dugi niz godina.

Dragi čitaoci, nakon ove dvije vijesti koje su obilježile 2015. godinu, teško je ne spomenuti trend odlaska naših mladih geodetskih stručnjaka iz Bosne i Hercegovine. U posljednje vrijeme evidentan je odlazak sve većeg broja nekadašnjih studenata Odsjeka za geodeziju Građevinskog fakulteta u Sarajevu u inostranstvo. Možemo li se usuditi i pitati: "Zašto?". S druge strane, posebno nas raduje da u ovom broju Geodetskog glasnika imamo članke mladih autora. Nadamo se da će se taj trend nastaviti i u budućnosti.

Među značajnim događajima u 2015. godini, spomenut ćemo još jedan, koji je u velikoj mjeri vezan za geodetsku struku. Nakon što su komisije za granicu BiH i Crne Gore u 2014. godini usaglasile sva granična dokumenta (uključujući topografsku kartu s ucrtanom graničnom

linijom i spisak koordinata svih prelomnih tačaka), Predstavnički dom Parlamentarne skupštine BiH dao je 24.11.2015. saglasnost za ratificiranje Ugovora o granici. Tako su Bosna i Hercegovina i Crna Gora, od bivših članica SFRJ, prve riješile pitanje granice.

Uporedo sa pripremom sadržaja časopisa Geodetski glasnik broj 46, Urednički odbor ulaže velike napore kako bi osigurao neophodna finansijska sredstva za štampanje časopisa. Obzirom da ste Vi, naši čitatelji, naše kolege i kolegice, obaviješteni o načinu prikupljanja finansijskih sredstava za štampanje Geodetskog glasnika, veoma mali broj geodeta se odazvao pozivu te aktivno učestvovao u izdavanju aktuelnog broja časopisa.

Optimističke vijesti nažalost, dolaze na kraju. Svakako je vrijedno naglasiti da je Geodetski glasnik trenutno indeksiran u referentnim međunarodnim bibliografskim bazama podataka. Nakon što je 2013. godine časopis referiran u bazi EBSCOhost (sa kojim imamo i potpisan sporazum), od ove godine je uključen i u DOAJ (Directory of Open Access Journals), sveobuhvatnu zbirku naučnih i stručnih časopisa sa otvorenim pristupom. Pored toga, Geodetski glasnik je evidentiran i od strane uglednih svjetskih univerzitetskih biblioteka, tako da ćete nas pronaći i u Sjevernoj Americi, Evropi, dalekom Japanu ili Novom Zelandu.

Savez udruženja građana geodetske struke u BiH pridružio se svjetskoj promociji kartografije i njene jedinstvene uloge u našem svijetu, postavljanjem logotipa Međunarodne godine karata na naslovnici ovog broja Geodetskog glasnika, kao i na svojoj web stranici. Pored toga, i kroz nekoliko zanimljivih članaka koje donosimo u ovom broju časopisa, željeli smo obilježiti 2015. godinu kao **Međunarodnu godinu karata**, te popularizirati kod nas veoma zapostavljenu istraživačku disciplinu historijske kartografije.

Svakako treba spomenuti i odlazak cijenjenog prof. dr. Asima Bilajbegovića u penziju. Profesor Bilajbegović, koji je rođen u Bosni i Hercegovini, dugi niz godina je bio profesor pri Geodetskom fakultetu Sveučilišta u Zagrebu, a nakon toga je novo zaposlenje našao u Njemačkoj (pri "University of Applied Sciences", Hochschule für Technik und Wirtschaft Dresden - Fakultät Geoinformation). Profesor Bilajbegović je bio angažovan i pri Odsjeku za geodeziju Građevinskog fakulteta Univerziteta u Sarajevu, gdje je bio nastavnik na predmetima koji pripadaju naučnim oblastima „Geodezije“ i „Više geodezije“. Nažalost, zbog aktuelnog Zakona o visokom obrazovanju Kantona Sarajevo, Građevinski fakultet nije u mogućnosti i dalje angažovati prof.dr. Bilajbegovića u nastavi. Profesoru Bilajbegoviću želimo dug život i dobro zdravlje, uz nadu da će i dalje pomagati geodetima Bosne i Hercegovine.

Usvajanjem novog Zakona o udruženjima i fondacijama na teritoriji Federacije Bosne i Hercegovine, neophodno je bilo provesti niz pravnih koraka kako bi svjetlo dana ugledao i ovaj broj Geodetskog glasnika, a naše Udruženje je preimenovano u *Savez udruženja građana geodetske struke u Bosni i Hercegovini*. Pored članstva SUGGSUBIH, veliki trud je uložio i nesebičnu pomoć pružio gosp. **mr. sc. iur. Alen Taletović, dipl. pravnik, pomoćnik ministra pravde pri Ministarstvu pravde Federacije Bosne i Hercegovine**, te mu se u ime našeg Udruženja, ali i svih čitalaca časopisa Geodetski glasnik najiskrenije zahvaljujemo.

Zahvaljujemo se svima koji su učestvovali u pripremi i izdavanju ovog broja Geodetskog glasnika, a naročitu zahvalnost dugujemo **Federalnom ministarstvu obrazovanja i nauke, Federalnoj upravi za geodetske i imovinsko-pravne poslove**, te kompaniji **GeoWild d.o.o. Sarajevo**, koje su sufinansiranjem pomogle štampanje časopisa. U nadi da ćemo još dugo godina imati priliku da zajedno kreiramo i čitamo naš Geodetski glasnik,

*Admir Mulahusić  
Predsjednik SUGGSBiH*